

Skirbi pa Clyde Harms

E doubleheader di 1958 na Aruba – Un secuela sorprendente y escandaloso



Mi a ricibi reaccion di varios hende pa e articulo cu mi a skirbi recientemente di e dos weganan di Liga Occidental Venezolana. Mayoria a djis menciona cu nan tambe a wak e weganan. Algun di nan a keda masha contento cu e splicacion cu Michael Kuiperi a haci di su yamada na segunda base. Tur ta corda e homerun cu Norm Shearer a dal pafo di stadion. Masha poco ta corda e scorenan. Rapiños de Maracaibo a gana e prome wega 6–2, mientras cu Petroleros de Cabimas a gana e di dos wega cu score di 4–2.

Mi amigo Waltie Croes a conta mi con e cu su tata tabata na e aeropuerto bieu sperando e avion cu e peloteronan. Nan a topa cu Rosendo Aparicio kende tabata ansioso pa ricibi su primo Luis. Manera miles di otro Arubiano, Waltie tambe tabata un admirado di Luis Aparicio. Despues cu Rosendo a cuminda Luis el a present'e na Waltie y su tata. Segun Waltie hamas e lo lubida e momento cu e, un mucha di 15 aña, tabatin e honor y privilegio di duna Luis Aparicio un man e mainta ey di december 1958.

Waltie a comparti un otro storia interesante cu mi. Hank Foiles ta un pelotero cu a hunga hopi aña den Liga Mayor di Merca

(All Stars 1957) y tambe a hunga na Venezuela. Hank tabata na Aruba di 7 te cu 21 di December 1912. Waltie a topa cu ne na Costa Linda Beach Resort caminda nan a papia hopi di baseball di Merca y su experiencianan na Venezuela. Aunke Hank no a hunga den Liga Occidental e campeonato di 1958-59, e ta corda hopi di e peloteronan di e epoca ey ya cu el a hunga den cinco diferente ekipo den e campeonatonan di 1953-1956 y esun di 1960-1961. E secuela di mi storia ta bin di Maracaibo. Manera mi ta haci pa tur mi articulonan, mi ta purba haya mas informacion posibel. Pa e articulo aki mi a haci mescos cu mi a haci tempo cu mi a skirbi e buki Historia di Baseball di Aruba dies aña pasa, mi a skirbi Panorama di Maracaibo pa mira si den nan hemeroteca tin un edicion cu algo di e weganan. Como mi amigo Eduardo Fernandez tabatin problema cu su computer mi a haya su contesta despues cu e articulo a sali caba.

E noticia sorprende t'ey escandaloso ta cu e dos weganan, weganan oficial #74 y #75 di Liga Occidental, a wordo anula sin cu e liga tabatin e decencia di avisa nos, e organisadonan di avisa nos, e organisadonan na Aruba! Si, nulo. Null and void. E rason ta increibel y

mas escandaloso ainda! Segun e relato di Panorama di 10 di december di 1958, Jesús Tronconis, e anotador oficial di e liga no a yega aeropuerto Granos de Oro aunke nan a wanta e avion un ora y mey. E weganan mester cuminsa 11'or di mainta, e avion tabata pa sali 8 or y ya tabata 9:30 am. Rómulo López, e Tesorero di e Liga mester a dicidi si ta tene e compromiso cu e organisadonan na Aruba of cancela e trip pasobra e weganan no ta bay tin un anotado oficial di e liga. Sr. López a declara cu el a wordo asegura cu na Aruba tin hende suficiente capacita pa anota un wega di baseball y a base di esey el a autorisa e teamnan biaha pa Aruba.

Ironicamente, riba e mes pagina di 8 di december 1958, net banda di caminda Panorama ta raporta e resultado di e weganan, nan ta raporta tambe cu Liga Occidental a declara nulo e weganan hunga na Aruba. En efecto nan a rechasa e trabou di e Arubiano cu a anota e wega. E organisadonan cu a paga miles di dollar pa dos wega oficial wordo hunga na nos isla, no a wordo avisa. Despues di 55 aña, nos no por gaba mas cu Rapiños y Petroleros a hunga dos wega oficial di Liga Occidental Venezolana den nos Wilhelmina Stadion. Nan ta considera weganan



amistoso di exhibicion. Manera nan ta bisa na Maracaibo, '¡Qué molleja!' Potret di Hank Foiles dedica na Waltie Croes. Foto cortesía di Waltie Croes November 17, 2003 Aguilas a re-

tira number 11 di Luis Aparicio (para riba homeplate).^{*} Plakkaat di Luis Aparicio den Hall of Fame na Cooperstown, NY. ^{*}Foto archivo di autor. Manda bo comentarionan pa clydeharms@yahoo.com